

Nelson Oduber lider di M.E.P.

A SPLICA PAKICO NO A INICIA

PROYECTO AEROPUERTO MAS PROME

ORANJESTAD (AAN) Lider di M.E.P. den programa radial a duna di conoce cu presupuesto 1992 a bin cla completamente y gobierno a entrego na Raad van Advies y cu tin su surplus di alrededor di 15 miyon florin y gobierno a mantene e gastonan den e margen di 5 pa 7 1/2 por ciento demostrando un disciplina pa gobernacion cu coalicion a palabra desde cu Aruba a traha su plan nacional di desaroyo pa e proximo 5 añanan.

Nelson Oduber a bisa "ta asina aki cu den cuadro di e desaroyo turistico nos tin nos aeropuerto cu nos awor aki ta sperando aki e bishita di e Ministro pa Asuntonan Antiyano/Arubano Sr. Hirsch Ballin pa definitivamente Aruba discuti cune e proyecto cu Flughafen Frankfurt a traha pa Aruba, despues NACO despues Flughafen Frankfurt, por fin NACO cu diferente cambionan ki mester bin promer expansion e renobacion, asunto di pista unda e avionnan mester para y un gran cantidad di puntonan pa un aeropuerto moderno".

Lider di MEP a bisa definitivamente gobierno lo plantea pa Gobierno Hulandes e proyecto aki pa un decision definitivo. Sea cu e Mercado Comun Europeo y e placa cu Aruba tin riba dje di ayudo pa desaroyo y cu e placa cu Aruba mes mester pone aden pa e proyecto aki o mester tuma otro recursonan financiero y bay riba e mercado financiero internacional cu tin hopi interes pa busca financiamiento pa aeropuerto.

Un aeropuerto cu e aña aki lo ricibi mei miyon hende y cu lo crece na 93 pa alrededor di 700 mil turista, no por keda den e condicion cu e ta. Dentro di seis luna tur cos mester ta cla y e movicion mester ta enmarcha pa e renobacion y expansion di aeropuerto di e forma ey

Aruba lo por brinda nos pueblo y turista e servicio cu e tin derecho riba dje.

Hopi ta esnan den nos comunidad cu lo puntra gobierno di con no a inicia e proyecto aki mas liher mirando su urgencia.

Sr. Oduber a bisa losiguiente: Gobierno a busca di tur moda pa parti di e placa cu Aruba tin derecho riba dje pa ayudo pa desaroyo worde uza pa e proyecto aki pasobra mitar di e suma lo ta regalo cu Aruba no tin cu paga back y e otro mitar di suma Aruba ta haya 30 aña pa paga back cu un interes di 2 1/2 por ciento. Esaki lo trece cune cu loke ta e tarifa pa e ta competitivo pa cu e aeropuertonan den region lo no tin un peso grandi.

Mientras cu si gobierno tuma e decision di busca financiamiento e interes por lo general ta entre 10 pa 12 por ciento. Consecuentemente e suma pa paga back mester worde calcula den e tarificanan di aeropuerto y cu esaki lo haci nos aeropuerto caro y den esey Aruba su posibilidad pa competi ta bira menos. Ta cu e mente ey poni dilanti, gobierno a carga tur e pasenshi di mundo pa dialoga y pa mira con pa yega na un solucion definitivamente pa Aruba su aeropuerto pa loque ta e plataforma y e terminal nobo cu mester worde construi.

Sr. Oduber a bisa cu si ta asina cu gobierno cu tin e plan nacional di desaroyo pa e proximo 5 añanan a acerca e banco inversion Hulandes N.E.B. cu a manda gobierno recientemente un carta unda nan tambe lo kier haci ehercicionan necesario pa mira pa financiamiento por ehempel pa entre otro aeropuerto.

Finalmente Nelson Oduber lider di MEP a bisa, gobierno ta carga e speranza ainda den e deliberacionnan cu gobierno tin cu Hulanda cu por yega den un entendimiento pa cu Hulanda.